



# Gschwätz

(ASP300-01.08.2001)



Eopas wo-n-ä gär nid ma  
ischt a-n-übrigs Gschwätz.  
S' Wichtig alls ma säga ka  
i ganz wenig Sätz.

Schickt uonna allmol viel varus  
und muont, ma sei dänn gspannt,  
woascht, der macht meischtens us ar Mus  
an rieso Elefant.


Du wartascht zwor, was ko no künt,  
blös ommosus, will ko tuot nünt.

Und fiondt ar 's End, wio d' a'nischt doch,  
denn ischt däs 's End nid, blös a Loch.


's bisherig Gschwätz i no vertrüg,  
wenn er eotz endlä eopas süg.  
Blös i der Zwüschozit miorkt jeda,  
der heot nünt z' sägot, der will blös reda.

Und wio-n-ar schließlä ufhört dänn,  
do frogat uonna, ob-o-n kenn.  
Der sei blös gsprung ganz schneoll i,  
der sei do Presse-Spreochar gsi.

Der wör wohl zämmogseklat wörro,  
hei viel meh gseit .... as ar het dörro.



(ASP300-01.08.2001)



huslä

(ASP301-14.08.2001)



Arzogo heot ma üs verkehrt,  
ma heot üs do no spära glehrt.


Der wo 's Geold nid hebo ka  
ischt hüt aber besser dra  
as der, wo 's i-n-an Spärstrupf seckt,  
bis as-om z'letscht dänn eh varreckt.

Gleornat hio-n-ä 's schließlä ou,  
hüt i 's Geold ou ussä hou.

Blös Hanseorg lot sä nid belehro,  
wetit ehndor üs bekehro,  
Hanseorg halt no 's Geold i-n-Ehro,  
Hanseorg git 's nid us mit Gwaalt,  
.... statt ar üs an Litar zahlt.

.....

(ASP301-14.08.2001)




bekehro


(ASP302-15.08.2001)



An Gschieda, wo 's Gräs waxo hört,  
die Dummo - wio mi - gär nid stört,  
solang ar rüobig ischt und still  
und mi nid no bekehro will.



(ASP302-15.08.2001)



normal

(ASP303-17.08.2001)




Und wenn i ou in Fettnapf grief  
Ihr alle siond nid objektiv.

I bild-mor i, i sei neutral,  
hei d' "Weisheit" mit dem Löffel g'schluckt,  
i sei dar uonzig ganz normal;  
die übrig Weolt .... dio sei varruckt.

Blös wenn-i do so om-mä schou,  
normal, muonont jeda .... er sei 's ou.



(ASP303-17.08.2001)



leoba lo

(ASP304-17.09.2001)



A-n-Auto zotlat vor mor anä,  
scho z' längscht nid vor iohm fahro ka-n-ä.


I dänk, wer andrä leoba lot,  
und wer nid hionder jeden grot,  
wer ou nid glei uf Palmo goht,  
nid pfuchat und und zoagat d' Krallo,  
und wer nid glei spritz Gift und Gallo,

tuot seolb sä all do gröschto Gfallo !

Blös, wenn deon Däp i überhol,  
tuot däs scho guot, däs scho wohl.



(ASP304-17.09.2001)



# Axiömer 2

(ASP305-26.10.2001)



Heot do Fallschirm ou a Loch,  
abar kuscht uf all Fäll doch.

Mit Stampfa blös, kuscht nid vom Fleock,  
du sinkscht blös tüfor i .... im Dreock.


Do Dummo d' Dummheit dromm so blogat,  
will gschied ar tuot, anstatt ar frogat.

Nid 's ommar rutscha uf-o Bänk,  
nei, 's Turna, 's Sportla halt uos glänk,  
und 's glänk si, 's glänk si ischt a Gschänk,  
halt, wenn 'm-ä nid dorbei vorränk.

Heoscht dummarwies du 's Ohr verfroro,  
heoscht d' Keltä noch-om Ohr erscht gsporo.



(ASP305-26.10.2001)



schüo

(ASP306-12.11.2001)




Schüo isch nid blös däs wo d' sioscht,  
Schüo nid blös was d' hörscht und lioscht.

Schüo ischt, wenn-ä seolb mä ma !  
schüo ischt, wenn-ä 's zuogio ka !  
schüo ischt, wenn-ä diosa trou !  
schüo ischt, wenn sä mior 's tuond ou !  
schüo ischt, wenn-ä nio säg nio !  
schüo ischt, wenn-ä gnüogsam bio !  
schüo ischt, wenn-ä 's Schüo no sioh !

schüo ischt froglos 's sorglos si,  
und dorbei no 's seocha i !



(ASP306-12.11.2001)



# Durscht

(ASP307-02.12.2001)



Do Hanseorg muoß ma reocht verstoh,  
ma heot dem Hanseorg u'reocht to.

Ma seit-om z' boscht, daß Hanseorg suf.  
Döt hört do Gschpass bim Hanseorg uf.

Übr-o Durscht schou er i 's Glas.

Muoscht scho froga, schließlä, was  
wiossond d' Lüt wio Hanseorg lit,  
wenn ma iohm kuon Schluck mä git.

Ar seit ar trink mit Ougo-Moß  
d' Lüt, woascht, übertriebend roß.


Wenn z' viel ar trüink, dänn wür-om schleocht;  
und zuodäm hei kuo Wissenschaft  
vo iohm do Durscht no z' meossot gschafft.

Und Hanseorg ischt dormit im Reocht.



(ASP307-02.12.2001)





plana

(ASP308-12.12.2001)



Wer gär z' lang planat, kut gern z' spät,  
was ohne plana er nid tät.



(ASP308-12.12.2001)



# Proteschtioro

(ASP309-19.12.2001)



Proterschtioro heot kuon Watz  
und ischt meischtens fehl am Platz.

Du kascht do Flüga nid verkehro,  
wenn sie ko Fröüd am Flüga-wehro  
wo d' Lüt tuond, seolb entwicklat händ  
und seolb sä ou halt wehro wänd.

Blös 's Proteschtioro ischt für d' Katz,  
as ischt i deom Fall fehl am Platz.

A-n- Uotagsflügo kut i Rasch,  
bewiest – ma seit - Zivil-Courasch.  
Sie nit dio Sach eotz seolb i d' Hand  
und schießt dir uf-o Tellar-Rand.  
Sie heot jo eh kuo Zit z' verlüro,  
Blös do „Protescht“ – den söllischt gschpüro.



(ASP309-19.12.2001)